



**Komunikadu Imprensa**  
**Parlamentu Nasionál**  
**04 Jullu 2019**

**Kestaun aprensaun, prizaun preventiva liu prazu no fiskalizasaun abstrata sai preokupasaun deputadu sira-nian iha apresiasaun relatóriu anuál PDHJ 2018**

Parlamentu Nasionál (PN) iha Tersa-feira 2 Jullu 2019, liuhosi reúniaun plenária halo apresiasaun ba relatóriu anuál Provedoria Direitu Umanu no Justisa (PDHJ) ba tinan 2018.

Iha apresentasaun, provedora Sra. Jesuina Maria Ferreira Gomes nian liga liu ba atividade no programa servisu ne'ebé durante ne'e sira halo liga ho knaar PDHJ nian no dezafiu sira ne'ebé sira infrenta iha implementasaun programa sira mak menus orsamentu iha kada tinan atu apoiu programa PDHJ nian tuir planu orsamentu PDHJ nian.

Entretantu iha diskusaun deputadu sira apresia tebes ho servisu PDHJ nian durante ne'e no kestaun sira ne'ebé sira preokupa mak kona-ba aprensaun ne'ebé ajente estadu sira prende hanesan kareta, pasaporte no sasán sira seluk tan ne'ebé la iha nia prazu no la iha andamentu ba prosesu ne'ebé prejudika tebes ema atu halo nia atividade no ida ne'e fó ameasa ba ema estranjeiru atu halo investimentu iha Timor-Leste. Kestaun seluk mós liga ba prizaun preventiva liu prazu inklui fiskalizasaun abstrata ba asuntu konstitusionalidade ne'ebé durante ne'e PDHJ nunka halo nia mandatu ida ne'e maske iha kazu barak akontese no persija tebes PDHJ nia tulun atu halo prosesu.

“JSMP konsidera kestaun sira ne'ebé deputadu sira apresenta pertinente tebes tanba Konstituisaun no lei sira atribui kompeténsia ne'ebé boot tebes hodi haree no trata, la'ós kestaun violasaun direitu umanu no boa governasaun, maibé kestaun konstitusionalidade no mós kestaun sira liga ho prosesu lejizlasaun hodi asegura katak enkuadramentu legál sira ne'e la kontrátriu ho prinsípiu direitu umanu sira ne'ebé konsagra iha konvensaun internasionál sira no Konstituisaun RDTL rasik,” dehan Diretór Interinu JSMP, Casimiro dos Santos.

Hatán ba kestaun ne'e, provedora ho nia adjuntu sira haktuir katak nia parte agradese ba deputadu sira liga ho preokupasaun sira hotu no iha kazu aprensaun sira rekoñese menus rekursu umanu ba sira atu halo servisu ida ne'e maibé sira iha ona planu servisu hamutuk ho rede direitu umanu internasionál nian atu halo kapasitasaun ba funsionáriu sira iha área ida ne'e hodi bele halo monitorizasaun ba kazu sira hanesan ne'e.

Kestaun seluk kona-ba prizaun preventiva liu prazu, provedora ne'e haktuir katak sira halo ona rekomendasaun ba instituisaun relevante sira hodi inklui mós prosesu “Habeas Corpus” ba ema sira ne'ebé hetan detensaun ka tama prizaun preventiva ilegalmente tanba liu prazu.

Relasiona ho kazu fiskalizasaun abstrata ba asuntu konstitusionalidade iha artigu 150 Konstituisaun RDTL, provedora hateten katak durante ne'e nunca halo tanba PDHJ seidak iha ema legál maibé agora iha ona ema, nune'e bele tulun PDHJ iha asuntu ne'e.

Totál keixa ne'ebé PDHJ simu iha 2018 hamutuk 203, kompostu hosi kazu violasaun direitu umanu 81 no kazu ne'ebé iha relasaun ho asuntu boa governasaun hamutuk 122. Hosi kazu hirak ne'e, kazu sira ne'ebé loke ba prosesu hamutuk 44 ne'ebé kompostu hosi kazu violasaun direitu umanu 23 no boa governasaun 21. Entretantu, tipu violasaun direitu umanu ne'ebé rejista mak violasaun ba direitu ba moris hamutuk 3, violasaun ba liberdade, integridade no seguransa hamutuk 18, violasaun ba direitu asesu ba justisa 1 no violasaun hasoru fetu 1.

Relasiona ho funksionamentu reúniaun plenária ne'e, JSMP observa katak plenária hahú tarde la tuir Rejimentu Parlamentu no deputadu barak mak hato'o tiha pergunta no depois abandona tiha plenária hodi la rona resposta hosi PDHJ. Prátika sira hanesan ne'e, dala barak JSMP rekomenda atu hadi'a hodi aseguira funksionamentu Parlamentu Nasionál nu'udar órgaun soberanu ida ne'ebé representa povu tomak.

Atu hetan informasaun liutan favor kontaktu direitamente:

Casimiro dos Santos  
Diretór Interinu JSMP  
Email: [santos.cas76@gmail.com](mailto:santos.cas76@gmail.com)  
Website : <http://jsmp.tl/>